

Bummel Fasnacht 2016

zem 56. Mool got's no Colmar



e Comité Schnitzelbangg

D Flüchtlingsmueter Simonetta
bietet jedem wo kunnt e Bett aa.
In Schutzrüm und Kasäärne, und denn git's no das Phagg,
das schlooft, bis es verhaftet wird, z'Ziiri im Baur au Lac.

Dr Lauber Toni, dä arm Siech,
y mein do unsere Regio Griech.
Falls dä emole aadrifsch und er vor dir stoot,
heb's Bortmenee, und seggle wäg, so schnäll wie s numme goot.

Der Morin Guy het ys verzelt,
är heeri uff, d Waiche sin gstellt,
fir das won är no mache will. Jä Guy waisch du denn nit,
dass es uff eme Abstellglais, gar keini Waiche git.

Dä Helge do isch, wie si gseen,
so glunge wyss und wunderscheen.
E Gschyys in wyss, nur wyss in wyss und was me druff ka gsee,
das isch denn nit s White Dinner – dasch der Embolo im Schnee.

Unter uns, es duet fascht wee,
wenn ych der neyi Playboy gsee.
Kaini blutte Wyyber me, und eppis isch frapant:
D Artiggel dungge mi uff s Mool, au nimm so intressant.

Der Obmaa Jürg schwätzt roosaroot
Iber dys und daas und was wie goot.
An der Ladäärnevernissage git är d Detail duure.
Zem Gligg isch denne d Fasnacht koo - sunscht wurd er jetzt no schnuure.

Vo ALT ROOSA so inspiriert,
het sich schyntz Aine ungeniert,
zer Notdurft - und vo däne zarte Farbe totaal bsoffe,
fir e stilli Vietelstund in d Klingeli-Bar verloffe.

Kuum Obmaa, scho nimmt är galant,
e Hampfle Bluemestrüss zer Hand.
Die griege d Rumplerfraue, und so mutiert dä Maa,
zer Neuusgoob vom „Blueme-Fritz“ us LEPMURIA.

Vo der Wettstai han y no vernoo:
E soo ka das nimm wyttergoo!
Zääch Flaisch derzue vom hogge, e Holzsprisse im Arsch.
E neye Marsch isch aagsait: Adie Schlissel - vorwärts marsch!

„Die achzig Chischte wei mer nit!
Do macht denn d SVP nit mit!
Nur wääge däre Uni do, wärdet zerscht konkreet.
Und überhaupt, was isch das gnau, en Uniwersideet?“

„Grüezi, do chönd's de Fischer gsee,
Bettware Au ... am Zürisee.“
Dä zeigt dert mit em Thämperamänt vomene doote Fisch,
dass in Ziiri s Hinderland, au nit vvyll besser isch.

Bresidäntin wärde will y,
seit d Hillary zue iirem Billi.
Die alti Schachtle wett dä Job und voll Ibermuet,
frait si sich uff e Braggtikant dä het si drum no z guet.

Am Bummel vo de Rumpler mit de Birli und

.... zämme mit der Alte Garde vo der Wettstai

Colmar,



6. Meerze 2016



Rumpel - Clique
Basel